



«ТАСДИҚЛАНГАН»
“Shurtan Gaz Kimyo Majmuasi”
МЧЖ ягона иштирокчисининг

2022 йил 9 сентябр даги
қарори №09/2022/24



“Shurtan Gaz Kimyo Majmuasi”
Масъулияти чекланган жамиятининг

УСТАВИ

(Янги таҳрирда)

Ғузор тумани – 2022 йил

I. УМУМИЙ ҚОИДАЛАР

1.1. Ушбу Уставнинг мақсади "SHURTAN GAZ KIMYO MAJMUASI" масъулияти чекланган жамиятининг тузилиши, фаолияти, қайта ташкил этилиши ва тугатилиши соҳасидаги муносабатларни тартибга солишдан иборат.

1.2. "SHURTAN GAZ KIMYO MAJMUASI" масъулияти чекланган жамияти Ўзбекистон Республикаси Президентининг 2019 йил 9 июль кунисидаги ПҚ-4388-сонли қарори билан "Ўзбекнефтгаз" АЖ таркибига ўтказилган ва унинг Устави аввал Қашқадарё вилояти, Ғузор тумани Давлат хизматлари марказида 4316-сонли рўйхат рақами билан 2018 йилнинг 19 июнь кунисида давлат рўйхатидан ўтказилган.

1.3. "SHURTAN GAZ KIMYO MAJMUASI" масъулияти чекланган жамият (келгусида –"Жамият"), Ўзбекистон Республикаси Конституцияси, "Масъулияти чекланган ҳамда қўшимча масъулиятли жамиятлар тўғрисида", "Тадбиркорлик фаолияти эркинлигининг кафолатлари тўғрисида"ги Ўзбекистон Республикасининг Қонунларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, бошқа норматив-ҳуқуқий ҳужжатларга, шунингдек ушбу Устав асосида иш олиб боради.

1.4. Жамиятнинг фирма номи:

а) Лотин алифбосига асосланган давлат тилидаги фирма номи - "SHURTAN GAZ KIMYO MAJMUASI" mas'uliyati cheklangan jamiyati;

Лотин алифбосига асосланган давлат тилидаги қисқартирилган фирма номи - "ShGKM" MCHJ;

б) Кирилл алифбосига асосланган давлат тилидаги тўлиқ фирма номи – "ШЎРТАН ГАЗ КИМЁ МАЖМУАСИ" масъулияти чекланган жамияти.

Кирилл алифбосига асосланган давлат тилидаги қисқартирилган фирма номи "ШГКМ" МЧЖ.

в) Рус тилидаги фирма номи - общество с ограниченной ответственностью "ШУРТАНСКИЙ ГАЗОХИМИЧЕСКИЙ КОМПЛЕКС";

Рус тилидаги қисқартирилган фирма номи- ООО "ШГХК";

1.5. Жамият, тадбиркорлик фаолиятини юритиш мақсадида тузилган. Жамият бир шахс томонидан таъсис этилган ва у Жамиятнинг ягона иштирокчиси ҳисобланади, Жамиятнинг таъсис ҳужжати Устав

ҳисобланади. Жамият иштирокчиларининг сони икки ва ундан ортиқ шахсга кўпайса, улар ўртасида таъсис шартномаси тузилади.

Жамият кейинчалик бир неча иштирокчилари бўлган жамиятга айланиши мумкин.

Жамият иштирокчиларининг сони элликтадан ошмаслиги керак.

1.6. Жамиятнинг ягона таъсисчиси (келгусида-“Ягона Иштирокчиси”):

“Ўзбекнефтгаз” акциядорлик жамияти (ИНН: 200837914. Жойлашган ва почта манзили: Ўзбекистон Республикаси, Тошкент шаҳри, Яшнабод тумани, Истиқбол кўчаси, 21-уй).

1.7. Жамият Ягона Иштирокчисининг ҳуқуқлари:

қонунларда ва ушбу Уставда белгиланган тартибда Жамиятнинг ишларини бошқаришда иштирок этиш;

қонунларда ва ушбу Уставда белгиланган тартибда Жамиятнинг фаолияти тўғрисида ахборот олиш ҳамда бухгалтерия дафтарлари ва бошқа ҳужжатлари билан танишиш;

фойдани тақсимлашда иштирок этиш;

Жамият тугатилган тақдирда, кредиторлар билан ҳисоб-китоб қилинганидан кейин қолган мол-мулкнинг бир қисмини ёки унинг қийматини олиш.

қонун ҳужжатлари ва ушбу Уставда назарда тутилган бошқа ҳуқуқларига ҳам эга бўлиши мумкин.

1.8. Жамият Ягона Иштирокчисининг мажбуриятлари:

Жамият Ягона Иштирокчиси:

қонун ҳужжатлари ва Уставда назарда тутилган тартибда, миқдорда, усулларда ва муддатларда ҳисса қўшиш ва қўшимча ҳисса бадаллар киритиш;

жамият фаолияти тўғрисидаги сир тутилган ахборотни ошкор қилмаслик;

таъсис ҳужжатлари кўрсатмаларига амал қилиш;

Жамиятга унинг фаолиятини амалга оширишда кўмаклашиш.

Жамият Ягона Иштирокчисининг қонун ҳужжатларида ва Уставда назарда тутилган бошқа мажбуриятлари ҳам бўлиши мумкин.

1.9. Жамиятнинг Ягона Иштирокчиси Жамият мажбуриятлари бўйича жавобгар бўлмайди ва Жамият фаолияти билан боғлиқ зарарлар учун ўзи қўшган ҳиссалар қиймати доирасида жавобгар бўлади.

1.10. Жамият қонун ҳужжатларида белгиланган тартибда давлат рўйхатидан ўтказилган пайдан эътиборан юридик шахс мақомига эга бўлади.

1.11. Жамият, мустақил хўжалик юритувчи субъект ҳисобланади.

Жамият ўзининг мустақил балансида ҳисобга олинган алоҳида мол-мулкка эга бўлади, ўз номидан ҳуқуқларни олиши, мажбуриятларга эга бўлиши, судда даъвогар ва жавобгар бўлиши мумкин.

Жамият банкда ҳисоб-китоб, валюта ва бошқа ҳисоб рақамларга эга бўлишга ҳақлидир.

Жамият тўлиқ фирма номи давлат тилида ифодаланган ва жамият жойлашган манзили кўрсатилган думолоқ муҳр, тўрт бурчак штампларига ва бланкаларига эга бўлишга ҳақлидир. Жамиятнинг муҳр, тўртбурчак штампларида ва бланкаларида унинг фирма номи жамиятнинг ихтиёрига биноан бошқа тилларда ҳам ифодаланиши мумкин.

Жамият ўз эмблемасига, шунингдек белгиланган тартибда рўйхатга олинган товар белгиси ва бошқа ўз белги аломатларига эга бўлишга ҳақлидир.

1.12. Жамият қонун ҳужжатларида белгиланган тартибда бошқа юридик шахсларнинг муассиси бўлишга ёки уларнинг устав фондида (устав капиталида) бошқача тарзда иштирок этишга, ваколатхоналар ва филиаллар тузишга ҳақлидир.

Жамият хўжалик ассоциациясига (уюшмага) бирлашишга ҳақлидир.

1.13. Жамият, ўз мажбуриятлари юзасидан ўзига қарашли барча мол-мулк билан жавобгар бўлади.

Жамият Ягона Иштирокчисининг мажбуриятлари юзасидан жавоб бермайди.

Жамиятнинг банкротлиги Ягона Иштирокчиси сифатидаги шахснинг айби туфайли вужудга келган бўлса, Жамиятнинг мол-мулки етарли бўлмаган тақдирда бундай шахс зиммасига унинг мажбуриятлари бўйича субсидар жавобгарлик юклатилиши мумкин.

Давлат ва унинг органлари Жамиятнинг мажбуриятлари юзасидан жавобгар бўлмайди.

1.14. Жамиятнинг жойлашган ва почта манзили:

Ўзбекистон Республикаси, Қашқадарё вилояти, Ғузор тумани, 180300, Шуртан мавзеси.

II. ЖАМИЯТ ФАОЛИЯТ ТУРИ, МАҚСАДИ ВА МУДДАТИ

2.1. Жамият фаолиятининг асосий мақсади - табиий газни қайта ишлаб, сифатли тозаланган газ, суюлтирилган углеводород газни, газ конденсати, полиэтилен грануласи (хом-ашё), олтингугурт, ўзи ишлаб чиқарган полиэтилен негизида турли хилдаги тайёр полиэтилен маҳсулотлари қайта ишлаб чиқариш ва истеъмолчиларга етказиб беришдан иборат.

2.2. Қуйидагилар жамият фаолиятининг турлари ҳисобланади:

Газни қайта ишлашни амалга ошириш;

Тозаланган газ ишлаб чиқариш ва сотиш;

Суюлтирилган углеводород газни ишлаб чиқариш ва сотиш;

Газ конденсатини ишлаб чиқариш ва сотиш;

Полиэтилен грануласи (хом ашё) ишлаб чиқариш ва сотиш;

Олтингугурт ишлаб чиқариш ва сотиш;

Аҳолига, корхоналарга нақд пул, пул кўчириш йўли билан полиэтилен грануласи (хом ашё)ни қайта ишлаш, тайёр полиэтилен буюмлари, маҳсулотларини ишлаб чиқариш, сотиб олиш ва сотиш;

Ўрнатилган тартибда ёрдамчи хўжалик ташкил этиш;

Чорвачилик, паррандачилик, балиқчилик, қишлоқ хўжалик маҳсулотлари етиштириш, ишлаб чиқариш ва сотиш;

Тижорат-воситачилик савдо фаолиятини амалга ошириш;

Улгуржи савдо, чакана савдо ва савдо воситачилик фаолияти амалга ошириш;

Махсус савдо дўконлари барпо этиш ва ишлаб чиқарилган, қайта ишлаб чиқарилган полиэтилен маҳсулотларини сотиш;

Ишчи таъминот ошхоналари ташкил этиш, умумий овқатланиш ошхоналари, ресторан, бар, чойхона, нонвойхоналар ташкил этиш;

Ижтимоий объектларга пуллик тўлов хизмати кўрсатишни йўлга қўйиш;

Ижара хизматини кўрсатиш;

Спорт соғломлаштириш хизмати фаолиятини ташкиллаштириш;

Маиший хизмат кўрсатиш фаолиятини ташкиллаштириш;

Автомобилларга суюлтирилган газ қуйиш шахобчаларини ташкил қилиш ва ўзида ишлаб чиқарилган суюлтирилган газни махсус шахобчалар орқали сотиш;

Халқ истеъмол моллари, саноат, хўжалик моллари сотиб олиш ва сотиш;

Товар-хом ашё биржасида, кўчмас мулк фонд биржаларида, ким ошди савдосида, қимматли қоғозлар бозорида, махсус ярмаркаларда иштирок этиш ва уларда олди-сотди ишларини бажариш;

Темир йўл транспорти хизматидан фойдаланишни йўлга қўйиш, ўзига тегишли бўлган темир йўл цистерналари, контейнерларни ижарага бериш ва пуллик хизмат кўрсатиш;

Ўрмон хўжалиги ташкиллаштириш, манзаравий боғлар яратиш, хар-хил мевали, манзарали кучатлар, гулзорлар ташкил этиш, кўчатлар, гуллар етиштириш ва сотиш;

Сув қувурлари, электроэнергетик тармоқлари, газ қувурлари орқали аҳолига, корхоналарга пуллик сув, электроэнергия ва газ таъминоти хизматини кўрсатиш;

Автотранспорт хизмати, автсервис хизматини ташкил этиш, аҳолига ва корхоналарга пуллик автотранспорт, автосервис хизматларини кўрсатиш;

Дам олиш санаториялари, оромгоҳлар, тиббий хизмат шифохоналари, амбулатория, дорихоналар ташкил этиш, аҳолига ва корхоналарга пуллик тиббий хизматлар кўрсатиш.

“Тадбиркорлик фаолияти эркинлигининг кафолатлари тўғрисида”ги Ўзбекистон Республикасининг Қонуни 19-моддаси асосида амалдаги қонун ҳужжатлари билан тақиқланмаган ва Уставда кўрсатилмаган ҳар қандай фаолият тури билан қонун ҳужжатларида белгиланган тартибда шуғулланиши мумкин.

Табиий ресурслардан фойдаланиш, экологик норма қоидаларига риоя этиш ва табиатни муҳофаза қилиш қонунларининг бажарилишини таъминлаш;

2.3. Махсус рухсатнома (лицензия) талаб этиладиган фаолият турлари қонунчиликда белгиланган тартибда рухсатнома олингач амалга оширилади.

2.4. Фаолиятининг мақсадлари:

хўжалик ва тадбиркорлик фаолиятини юритиш;

ўз маҳсулоти, ишлари ва хизматларига бўлган эҳтиёжларини қаноатлантириш ҳамда ана шу асосда меҳнат жамоасининг ижтимоий ва иқтисодий манфаатларини ҳамда жамият мол-мулки эгаларининг (иштрокчиларининг) манфаатларини таъминлаш;

фойда олиш.

2.5. Фаолиятнинг муддати:

Жамият номуайян муддатга тузилади.

2.6. Корхона амалдаги қонунчиликка мувофиқ, мустақил равишда штатларни, иш ҳақи тўлаш шакллари ва тизимларини, қўшимча мукофатлаш ва моддий рағбатлантиришларнинг бошқа турларини ўрнатилган тартибда тасдиқлайди ва амалиётга жорий этади.

III. ЖАМИЯТНИНГ УСТАВ ФОНДИ

3.1. Жамият Устав фонди (устав капитали) унинг Ягона Иштирокчи улушларининг номинал қийматларидан таркиб топади.

3.2. Жамият Ягона Иштирокчиси улушининг ҳақиқий қиймати жамият соф активлари қийматининг унинг улуши миқдорига мутаносиб бўлган бир қисмига мос бўлади.

3.3. Қуйидагилар Жамият мол мулкани ташкил этувчи манбалардир:

таъсис этувчининг пул ва моддий бадаллари;

маҳсулот, ишлар, хизматларни реализация қилишдан, шунингдек, хўжалик фаолиятининг бошқа турларидан олинган даромадлар;

банк ва бошқа қарз берувчиларнинг кредитлари;

Ўзбекистон Республикаси қонун ҳужжатлари билан тақиқланмаган ўзга манбалар.

3.4. Жамият 207 382 514 809 (Икки юз етти миллиард уч юз саксон икки миллион беш юз ўн тўрт минг саккиз юз тўққиз) сўм 64 тийин Устав Фондига эга бўлиб, у тўлиқ шаклланган.

3.5. Жамиятнинг устав фонди 1 улушдан иборат бўлиб, у яхлитлигича 207 382 514 809 (Икки юз етти миллиард уч юз саксон икки миллион беш юз ўн тўрт минг саккиз юз тўққиз) сўм 64 тийинни ташкил қилади ва "Ўзбекнефтгаз" акциядорлик жамиятининг (Ягона таъсисчисининг) улуши бўлиб ҳисобланади.

3.6. Жамиятнинг Ягона иштирокчиси томонидан ҳиссанинг тўлиқ киритилганлиги Жамият Ягона Иштирокчисига бериладиган гувоҳнома билан тасдиқланади.

IV. ЖАМИЯТНИНГ УСТАВ ФОНДИГА ҚЎШИЛАДИГАН ХИССАЛАР

4.1. Пул, қимматли қоғозлар, ўзга ашёлар ёки мулк хуқуқлар ёхуд пул баҳосига эга бўлган бошқа шахсга ўтказиладиган ўзга хуқуқлар Жамиятнинг устав фондига қўшиладиган ҳиссалар бўлиши мумкин.

4.2. Жамиятнинг Ягона иштирокчиси томонидан Жамиятнинг устав фондига қўшиладиган пулсиз ҳиссаларнинг пул баҳоси Жамият Ягона иштирокчиси қарори билан тасдиқланади.

V. ЖАМИЯТ УСТАВ ФОНДИНИНГ КЎПАЙТИРИШ

5.1. Жамиятнинг устав фондини кўпайтиришга у тўлиқ тўланганидан кейингина йўл қўйилади.

5.2. Жамиятнинг устав фондини кўпайтириш Жамият Ягона иштирокчисининг қарорига биноан амалга оширилади.

5.3. Жамият устав фондининг кўпайтирилиши Жамиятнинг мол-мулки ҳисобига ва (ёки) Жамият Ягона иштирокчисининг қўшимча ҳиссалари ҳисобига ва (ёки), Жамиятга қабул қилинадиган учинчи шахсларнинг ҳиссалари ҳисобига, қонун ҳужжатлари ва ушбу Уставда ўрнатилган тартибда амалга оширилиши мумкин.

VI. ЖАМИЯТНИНГ УСТАВ ФОНДИНИ УНИНГ МОЛ-МУЛКИ ҲИСОБИГА КЎПАЙТИРИШ

6.1. Жамият устав фондини (устав капиталини) Жамиятнинг мол-мулки ҳисобига кўпайтириш тўғрисидаги қарор бундай қарор қабул қилинган йилдан олдинги йил учун Жамиятнинг бухгалтерия ҳисоботи маълумотлари асосидагина қабул қилиниши мумкин.

6.2. Жамият устав фонди (устав капитали) Жамиятнинг мол-мулки ҳисобига кўпайтириладиган сумма Жамият соф активларининг қиймати билан устав фонди (устав капитали) ҳамда заҳира фонди суммаси ўртасидаги фарқдан ортиқ бўлмаслиги керак.

6.3. Жамиятнинг устав фонди (устав капитали) ушбу моддага мувофиқ кўпайтирилганда Жамият Ягона Иштирокчи улушларининг миқдорлари ўзгармаган ҳолда улар улушларининг номинал қиймати мутаносиб равишда кўпаяди.

VII. ЖАМИЯТНИНГ УСТАВ ФОНДИНИ КАМАЙТИРИШ

7.1. Жамият ўз устав фондини камайтиришга ҳақлидир, қонун ҳужжатларида назарда тутилган ҳолларда эса, Жамият ўзининг Ягона иштирокчини Жамият устав фондидаги улушларининг номинал қийматини камайтириши ва (ёки) Жамиятга тегишли улушларнинг ҳақини тўлаш орқали устав фондини камайтириши шарт.

7.2. Жамият, агар бундай камайтириш натижасида устав фондининг (устав капиталининг) миқдори Жамиятнинг таъсис ҳужжатларидаги тегишли ўзгартишларни давлат рўйхатидан ўтказиш

учун ҳужжатларни тақдим этиш санасидаги ҳолатга кўра «Масъулияти чекланган ҳамда қўшимча масъулиятли жамиятлар тўғрисида»ги қонунга мувофиқ белгиланган устав фондининг (устав капиталининг) минимал миқдоридан кам бўлиб қолса, кўрсатилган қонунга мувофиқ Жамият ўз устав фондини (устав капиталини) камайтиришга мажбур ҳолларда эса Жамият давлат рўйхатидан ўтказилган санадаги ҳолатга кўра кўрсатилган қонунга мувофиқ белгиланган устав фонди (устав капиталининг) минимал миқдоридан кам бўлиб қолса, Жамият ўзининг устав фондини (устав капиталини) камайтиришга ҳақли эмас.

7.3. Агар иккинчи ва ҳар бир кейинги молия йили тугаганидан кейин Жамият соф активларининг қиймати унинг устав фондидан (устав капиталидан) кам бўлиб қолса, Жамият ўзининг устав фондини (устав капиталини) ўзининг соф активлари қийматидан ошмайдиган миқдоргача камайтирилишини эълон қилиши ва бундай камайтиришни белгиланган тартибда рўйхатдан ўтказиши шарт.

7.4. Агар иккинчи ва ҳар бир кейинги молия йили тугаганидан кейин Жамият соф активларининг қиймати Жамиятнинг давлат рўйхатидан ўтказилиши санасидаги ҳолатга кўра «Масъулияти чекланган ҳамда қўшимча масъулиятли жамиятлар тўғрисида» Қонунда белгиланган устав фондининг (устав капиталининг) минимал миқдоридан кам бўлиб қолса, Жамият тугатилиши керак.

7.5. Жамият соф активларининг қиймати қонун ҳужжатларида белгиланган тартибда аниқланади.

7.6. Жамият ўз устав фондини (устав капиталини) камайтириш тўғрисида қарор қабул қилинган санадан эътиборан 30 (ўттиз) кун ичида Жамиятнинг устав фонди (устав капитали) камайтирилгани ва унинг янги миқдори ҳақида Жамиятнинг ўзига маълум бўлган барча кредиторларини ёзма равишда хабардор қилиши, шунингдек қабул қилинган қарор тўғрисида оммавий ахборот воситаларида хабар эълон қилиши шарт. Бунда Жамият кредиторлари ўзларига хабарнома йўлланган санадан эътиборан 30 (ўттиз) кун ичида ёки қабул қилинган қарор тўғрисида хабар эълон қилинган санадан эътиборан 30 (ўттиз) кун ичида жамият тегишли мажбуриятларини муддатидан илгари тугатишини ёки ижро этишини ҳамда ўзлари кўрган зарарнинг ўрнини қоплашини ёзма равишда талаб қилишга ҳақлидирлар.

Жамиятнинг устав фондини (устав капиталини) камайтириш билан боғлиқ таъсис ҳужжатларидаги ўзгартишларни давлат рўйхатидан ўтказиш кредиторлар ушбу моддада белгиланган тартибда хабардор қилинганлиги далиллари тақдим этилган тақдирдагина қонун ҳужжатларига мувофиқ амалга оширилади.

7.7. Ушбу Уставнинг 7.1.-7.6.-бандларида назарда тутилган ҳолларда Жамият ўз устав фондини (устав капиталини) камайтириш ёки ўзининг тугатилиши тўғрисида 3 (уч) ойлик муддатда қарор қабул қилмаса, кредиторлар Жамият мажбуриятларини муддатидан илгари тугатишини ёки ижро этишини ва ўзлари кўрган зарарнинг ўрнини қоплашини талаб қилишга ҳақлидир. Юридик шахсларни давлат рўйхатидан ўтказувчи орган бундай ҳолларда Жамиятни тугатиш тўғрисида судга талабнома тақдим этишга ҳақлидир.

VIII. ЖАМИЯТ ИШТИРОКЧИСИНИНГ ЖАМИЯТ УСТАВ ФОНДИДАГИ УЛУШИНИНИНГ (УЛУШИ БИР ҚИСМИНИНГ) ЖАМИЯТНИНГ БОШҚА ИШТИРОКЧИЛАРИГА ВА УЧИНЧИ ШАХСЛАРГА ЎТИШИ. ЖАМИЯТНИНГ УСТАВ ФОНДИДАГИ УЛУШЛАР ГАРОВИ

8.1. Жамият Ягона иштирокчисининг ўз ихтиёри билан (Ўзбекистон Республикасининг ваколатли Давлат органининг қарори мавжуд бўлган ҳолатлар бундан мустасно) Жамиятдан чиқиб кетишига йўл қўйилмайди.

8.2. Жамият иштирокчиларинингсони икки ва ундан ортиқ шахсга ортган тақдирда, Жамиятнинг иштирокчиси Жамиятнинг устав фондидаги ўз улушини ёхуд унинг бир қисмини Жамиятнинг бир ёки бир неча иштирокчисига сотишга ёки ўзга тарзда улар фойдасига воз кечишга ҳақли бўлади.

8.3. Жамият иштирокчиси ўз улушини (улушининг бир қисмини) учинчи шахсларга сотиши ёки бошқача тарзда уларнинг фойдасига воз кечиши мумкин.

8.4. Жамият иштирокчисининг Жамият устав фондидаги улушининг (улуши бир қисмининг) Жамиятнинг бошқа иштирокчиларига ва учинчи шахсларга ўтиши, қонун ҳужжатлари ва ушбу Уставда ўрнатилган тартибда амалга оширилади.

8.5. Жамиятнинг Ягона иштирокчисига тегишли Жамиятнинг устав фондидаги (устав капиталидаги) улушни тўлалигича ёки унинг маълум бир қисмини Ягона таъсисчининг розилигисиз гаровга қўйилиши таъқиқланади.

IX. ЖАМИЯТНИНГ УСТАВ ФОНДИДАГИ УЛУШНИ(УЛУШНИНГ БИР ҚИСМИНИ) ЖАМИЯТ ТОМОНИДАН ОЛИНИШИ

9.1. Жамият ўзининг устав фондидаги улушни (улушнинг бир қисмини) олишга ҳақли эмас, қонун ҳужжатларида назарда тутилган ҳоллар бундан мустасно.

Х. ЖАМИЯТНИНГ ФОЙДАСИНИ ТАҚСИМЛАШ. ТАҚСИМЛАШ ВА ТЎЛАШДАГИ ЧЕКЛАШЛАР. ЖАМИЯТНИНГ ЗАХИРА ФОНДИ

10.1. Ягона Иштирокчи йилнинг ҳар чорагида, ярим йилда бир марта ёки бир йилда бир марта Жамият соф фойдасини тақсимлаш тўғрисида амалдаги қонунчиликда белгиланган тартибда қарор қабул қилишга ҳақлидир.

10.2. Жамиятнинг соф фойдаси тўлиқ (100 %) жамият Ягона иштирокчисига тегишли улуш учун хисобланган дивиденд шаклидаги маблағ бўлиб хисобланиб, уни тақсимлаш тўғрисидаги қарор жамиятнинг ягона иштирокчиси томонидан қабул қилинади ва бу каби қарорнинг қабул қилинишида жамиятнинг соф фойдаси тақсимланадиган ҳар бир давридаги молиявий хисоботлари жамиятнинг ташқи аудитори томонидан ўтказилган аудиторлик текшируви хулосасига асосланади.

10.3. Жамият қуйидаги ҳолларда соф фойдани Жамиятнинг Ягона иштирокчисига тақсимлаш тўғрисида қарор қабул қилишга ҳақли эмас:

Жамиятнинг бутун устав фонди (устав капитали) тўлиқ тўлангунга қадар;

қонунларда назарда тутилган ҳолларда Жамият Ягона иштирокчисининг улушини (улуши бир қисмининг) ҳақиқий қиймати тўлангунга қадар;

агар бундай қарорни қабул қилиш пайтида Жамият қонунга мувофиқ банкротлик белгиларига жавоб берса ёки агар мазкур белгилар Жамиятда шундай қарор қабул қилиниши натижасида пайдо бўлса;

агар шундай қарорни қабул қилиш пайтида Жамият соф активларининг қиймати унинг устав фондидан (устав капиталидан) ва захира фондидан кам бўлса ёки шундай қарор қабул қилиниши натижасида уларнинг миқдоридан камроқ бўлиб қолса;

қонун ҳужжатларида назарда тутилган бошқа ҳолларда.

10.4. Жамият ўзининг Ягона иштирокчисига тақсимланиши тўғрисида қарор қабул қилинган қуйидаги ҳолларда Жамият Ягона иштирокчисига фойдани тўлашга ҳақли эмас:

агар тўлаш пайтида Жамият қонунга мувофиқ банкротлик белгиларига жавоб берса ёки агар мазкур белгилар Жамиятда тўлов натижасида пайдо бўлса;

агар тўлаш пайтида Жамиятнинг соф активлари қиймати унинг устав фондидан (устав капиталидан) ва захира фондидан кам бўлса ёки тўлаш натижасида уларнинг миқдоридан камроқ бўлиб қолса;

қонун ҳужжатларида назарда тутилган бошқа ҳолларда.

Ушбу бандда кўрсатилган ҳолатлар тугаганидан кейин Жамият тақсимланиши тўғрисида қарор қабул қилинган фойдани тўлаши шарт.

10.5. Жамият устав фондининг (устав капиталининг) ўн беш фоизи миқдоридан захира фондини шакллантиради.

Жамиятнинг захира фонди Жамиятнинг уставидан белгиланган миқдорга етгунга қадар ҳар йили соф фойдадан ажратмалар қилиш йўли билан шакллантирилади.

Ҳар йилги захира фонди ажратмалари Жамиятнинг уставидан белгиланган захира фонди миқдорига етгунга қадар соф фойданинг беш фоизидан кам бўлиши мумкин эмас.

Жамиятнинг захира фонди "Масъулияти чекланган ҳамда қўшимча масъулиятли жамиятлар тўғрисида"ги қонунда назарда тутилган ҳолларда унинг зарарларини қоплаш ва Жамият томонидан Жамиятнинг устав фондидаги (устав капиталидаги) улушни (улушнинг бир қисмини) олиш учун мўлжаллангандир.

XI. ЖАМИЯТНИНГ БОШҚАРУВ ОРГАНЛАРИ

11.1. Жамиятнинг Ягона Иштирокчиси.

11.2. Жамиятнинг Ижроия органи.

XII. ЖАМИЯТ ЯГОНА ИШТИРОКЧИСИНИНГ ВАКОЛАТЛАРИ

12.1. Жамият иштирокчиларининг умумий йиғилиши ваколатлари жумласига кирувчи масалалар юзасидан қарорлар Жамиятнинг Ягона иштирокчиси томонидан яқка тартибда қабул қилинади ва ёзма равишда расмийлаштирилади.

12.2. Жамият Ягона иштирокчисининг мутлақ ваколатлари жумласига қуйидагилар киради:

Жамият фаолиятининг асосий йўналишларини белгилаш, шунингдек тижорат ташкилотларининг бошқа бирлашмаларида иштирок этиш тўғрисида қарор қабул қилиш;

Жамият устав фондининг миқдорини ўзгартириш;

Жамиятнинг Уставга ўзгартиш ва қўшимчалар киритиш;

Жамиятнинг ташкилий тузилмасини тасдиқлаш, Кузатув кенгаши ҳамда Ижроия органларини тузиш ва уларнинг ваколатларини муддатидан илгари тугатиш;

Жамиятнинг тафтиш комиссиясини (тафтишчисини) сайлаш ва унинг ваколатларини муддатидан илгари тугатиш;

Йиллик ҳисоботларни ва йиллик бухгалтерия балансларини тасдиқлаш;

Жамиятнинг соф фойдасини тақсимлаш тўғрисида қарор қабул қилиш;

Жамият органларининг фаолиятини тартибга солувчи ҳужжатларини тасдиқлаш (қабул қилиш);

аудиторлик ташкилотлари ҳамда уларнинг хизматларига тўланадиган ҳақнинг энг кўп миқдорини аниқлаш;

бошқа юридик шахсларни, ваколатхоналар ва филиалларни тузиш тўғрисида қарор қабул қилиш;

Жамиятни қайта ташкил этиш ёки тугатиш тўғрисида қарор қабул қилиш;

тугатувчини тайинлаш ва тугатиш балансларини тасдиқлаш;

қонун ҳужжатларида назарда тутилган бошқа масалаларни ҳал қилиш.

12.3. Жамият Ягона иштирокчисининг Жамият фаолиятининг йиллик натижаларини тасдиқлаш билан боғлиқ қарори амалдаги қонунчиликда ўрнатилган муддатларда, аммо ҳар бир молия йили тугаганидан кейин кечи билан 4 (тўрт) ой ичида қабул қилинади ва Жамиятнинг Кузатув кенгашининг ташаббуси, қарори, тавсияси ва таклифига биноан амалга оширилади (қабул қилинади).

12.4. Жамият Ягона иштирокчисининг навбатдан ташқари қарори, агар бундай қарор қабул қилишни Жамиятнинг ва унинг Ягона иштирокчисининг манфаатлари тақазо этса, бошқа ҳолларда ҳам қабул қилиниши мумкин.

12.5. Жамият Ягона иштирокчисининг мутлақ ваколатлари жумласига киритилган масалалар, Ўзбекистон Республикасининг "Масъулияти чекланган ҳамда қўшимча масъулиятли жамиятлар тўғрисида"ги Қонунда назарда тутилган ҳолларни истисно этганда, унинг томонидан Жамиятнинг Кузатув кенгаши ҳал этиши учун, шунингдек Жамиятнинг Ижро этувчи органи ҳал этиши учун топширилиши мумкин эмас.

XIII. ЖАМИЯТНИНГ ИЖРОИЯ ОРГАНИ

13.1. Жамиятнинг кундалик фаолиятига раҳбарлик коллегиял ижроия орган (кейинги ўринларда - Дирекция) - Жамият Ягона иштирокчисининг қарори билан тасдиқланадиган коллегиял Дирекция

томонидан амалга оширилади ва Дирекция фаолиятига Жамият Ягона иштирокчисининг қарори билан тайинланадиган Жамият Бош директори раҳбарлик қилади.

13.2. Дирекция 7 (етти) кишидан иборат.

13.3. Дирекция таркибига қуйидагилар киради:

- Бош директор;

- Бош директорнинг биринчи ўринбосари – бош муҳандис;

Бош директорнинг ишлаб чиқариш бўйича ўринбосари;

Бош директорнинг умумий масалалар бўйича ўринбосари;

Бош директорнинг инвестициялар ва инновациялар бўйича ўринбосари;

Бош директорнинг иқтисод, молия ва ижтимоий масалалар бўйича ўринбосари;

Бош директорнинг капитал қурилиш ва таъмирлаш бўйича ўринбосари.

13.4. Дирекция Жамиятнинг кундалик фаолиятини бошқаради ва оператив раҳбарликни Ўзбекистон Республикаси қонунчилиги, Жамият Устави, Жамият Ягона иштирокчиси ва Жамият Кузатув кенгашининг қарорларига мувофиқ амалга оширади.

13.5. Дирекция йилнинг ҳар чорак, ярим йиллик, тўққиз ойлик ва йиллик натижалари бўйича Жамият Ягона иштирокчисига ва Жамият Кузатув кенгашига ҳисобот беради.

13.6. Жамиятнинг Бош директори ўрнатилган тартибда келишилган ҳолда Жамият Ягона иштирокчисининг қарорига асосан бир йиллик муддатга лавозимга сайланади (тайинланади) ва лавозимидан озод этилади.

13.7. Дирекция аъзолари Жамият Кузатув кенгаши томонидан қонунчиликда ва мазкур Уставда белгиланган тартибда бир йиллик муддатга Дирекция аъзолигига сайланадилар (тайинланадилар) ва озод этиладилар.

13.8. Бош директор билан меҳнат шартномасини Жамият номидан Жамият Кузатув кенгаши раиси имзолайди. Дирекция аъзолари билан меҳнат шартномаларини Жамият номидан Жамият Кузатув кенгаши раиси ёки Жамият Кузатув кенгаши ваколат берган шахс имзолайди.

13.9. Жамият ходимлари мазкур Уставга ва амалдаги қонун ҳужжатларига мувофиқ Бош директор билан меҳнат шартномасини тузадилар.

13.10. Дирекциянинг ваколатларига Жамиятнинг кундалик фаолиятига раҳбарлик қилишга доир барча масалалар киради, Жамият Ягона иштирокчисининг мутлақ ваколатларига ёки Жамият Кузатув кенгашининг ваколатларига киритилган масалалар бундан мустасно.

13.11. Дирекция Жамият Ягона иштирокчиси ва Жамият Кузатув кенгашининг қарорлари бажарилишини ташкил этади.

13.12. Дирекция мазкур Устав ва Жамият Ягона иштирокчиси томонидан тасдиқланган «Ижроия органи тўғрисида»ги Низом асосида иш олиб боради.

13.13. Дирекциянинг мажлиси зарур ҳолларда, бироқ бир ойда камида бир марта ўтказилади. Дирекция томонидан Жамият Кузатув кенгаши ёки Жамият Ягона иштирокчисига ҳал қилиши учун киритиладиган масалалар мажбурий тартибда Дирекция мажлисида олдиндан муҳокама этилади. Дирекциянинг фикри ҳақида Бош директор ёки у томонидан ваколат берилган Дирекция аъзоси ахборот беради ва ҳимоя қилади.

13.14. Дирекциянинг мажлиси унинг кун тартибига киритилган масалаларни, агар мажлисда Дирекция аъзоларининг 3/4 қисми қатнашса, ҳал қилишга ҳақлидир.

13.15. Дирекция мажлисида қарорлар мажлисда қатнашаётган Дирекция аъзоларининг оддий кўпчилик овози билан қабул қилинади. Дирекция мажлисида масалалар ҳал этилаётганда Дирекциянинг ҳар бир аъзоси битта овозга эга. Овозлар тенг бўлиб қолган тақдирда Бош директорнинг овози ҳал этувчи ҳисобланади.

Дирекция томонидан қабул қилинган қарорга рози бўлмаган Дирекция аъзолари ўз фикрларини Жамият Кузатув кенгашига билдиришлари мумкин.

13.16. Дирекция мажлисида баённома юритилади. Баённома мажлисда иштирок этаётган Дирекция аъзолари томонидан имзоланади, улар мажлис баённомаси тўғри расмийлаштирилиши учун жавобгар бўлади. Дирекция мажлисининг баённомаси Кузатув кенгаши ва Тафтиш комиссияси аъзоларига, шунингдек аудиторга уларнинг талабига кўра тақдим этилади.

13.17. Дирекциянинг мажбуриятлари ва ваколатларига қўйидагилар киради:

ўз ваколатлари доирасида Жамиятнинг мол-мулки ва пул маблағларини тассаруф этиш;

Жамиятнинг таркибий бўлинмалари тўғрисидаги низомлар, ходимларнинг лавозим йўриқномаларини тасдиқлаш;

Жамиятнинг ички меъёрий ҳужжатларини тасдиқлаш, Жамият Ягона иштирокчисининг ёки Жамият Кузатув кенгашининг ваколатларига киритилган масалалар бундан мустасно;

Жамият таркибидаги шўба ва тобе хўжалик жамиятлари, ваколатхоналари ва филиаллари учун мажбурий бўлган Дирекция қарорларини қабул қилиш;

Жамият филиаллари ва ваколатхоналари низомларини тасдиқлаш ва уларга ўзгартириш ва қўшимчалар киритиш;

Жамиятнинг таркибий бўлинмаларининг ўзаро самарали ҳаракатини таъминлаш;

Жамиятни ривожлантириш дастурлари ва бизнес-режалари ишлаб чиқиш, уларни ташкил этиш ва бажарилишини назорат қилиш;

Жамиятнинг ваколатли бошқарув органи томонидан тасдиқланган бизнес-режада кўрсатилган миқдорларда фойда олишни таъминлаш;

қонунчиликка мувофиқ Жамиятда бухгалтерия ҳисоби ва ҳисоботининг ташкил этилиши, зарар ҳолати ва ишончилигини, йиллик ҳисоботлар ва бошқа молиявий ҳисоботлар тегишли органларга ўз вақтида тақдим этилишини, шунингдек Жамият Ягона иштирокчисига, кредиторларга ва бошқа олувчиларга юбориладиган Жамият фаолияти тўғрисидаги маълумотларни ўз вақтида ва тўлиқ тақдим этилишини таъминлаш;

Жамиятнинг молия-хўжалик фаолияти тўғрисидаги ҳужжатлар Жамиятнинг Кузатув кенгаши, Тафтиш комиссияси ёки Жамият аудитори талабига кўра тақдим этиш;

ўз ваколати доирасида мол-мулкни олиш ёки уни бошқа шахсга бериш ёхуд мол-мулкни бошқа шахсга бериш эҳтимоли билан боғлиқ битим тузиш (битим тузиш масаласида Дирекция яқдиллигига эришилмаган ҳолларда битим тузиш тўғрисидаги масала Дирекция қарорига мувофиқ Жамият Кузатув кенгаши ҳукмига ҳавола этилиши мумкин);

Жамиятнинг тижорат сирини ташкил этувчи маълумот ва ахборотларни сақлаш, муҳофаза қилинишини ҳамда улардан фойдаланиш тартибини белгилаш Жамиятнинг тижорат сирини ташкил этувчи маълумотлар рўйхати Дирекция томонидан белгиланади;

ўз ваколатига тегишли ишларнинг ҳолати тўғрисидаги ахборотни Жамият Ягона иштирокчисига ва Жамият Кузатув кенгашига белгиланган муддатларда ўрнатилган тартибда тақдим этиш;

Жамият Ягона иштирокчисининг ва Кузатув кенгашининг мажлисларида қатнашиш;

Ўз ваколатлари доирасида Жамиятнинг самарали ва барқарор ишлашини таъминлаш;

Ўзбекистон Республикаси қонун ҳужжатларига ҳамда Жамият ички ҳужжатларига риоя қилиш;

Дирекция, қонунчилик, ушбу устав ва Жамиятнинг меъёрий ҳужжатларига мувофиқ бошқа ҳуқуқ (ваколат) ва мажбуриятларга ҳам эга бўлиши мумкин.

Дирекция ваколатига кирувчи баъзи бир ҳаракатларни амалга ошириш Дирекция аъзоларининг ўзаро розилиги асосида фаолият йўналишлари бўйича Дирекциянинг бир аъзосига юклатилиши мумкин.

13.18. Жамият Бош директорининг мажбуриятлари ва ваколатларига қўйидагилар киради:

Ўзининг ваколатлари доирасида Жамиятнинг кундалик фаолиятига умумий раҳбарлик қилиш;

Давлат статистика ҳисоботи ва бухгалтерия ҳисоботини тегишли органларга тўлиқ ва ўз вақтида тақдим этилишини таъминлайди;

Жамиятни малакали кадрлар билан таъминлайди, Жамият ходимларининг билими, малакаси, тажрибаси ва қобилиятларидан энг яхши фойдаланиш чораларини кўради;

Жамият ходимларининг ижтимоий кафолатларига риоя қилинишини ва улар меҳнатини муҳофаза қилишни таъминлайди;

Штатларни белгилайди, ходимларнинг штат рўйхатини тасдиқлайди;

Ягона иштирокчи билан келишилган ҳолда Жамиятнинг филиаллари ва ваколатхоналари раҳбарларини лавозимга тайинлайди ва лавозимдан озод этади;

Жамият филиаллари ва ваколатхоналари штат жадвалларини тасдиқлайди;

Жамият номидан ишончномасиз иш юритади, давлат ҳокимияти ва бошқаруви идораларида, барча мулк шаклларидаги корхона ва ташкилотларда унинг манфаатларини ҳимоя қилади;

Банкларда ҳисоб рақамлар шу жумладан валюта ҳисоб рақамларини очади ва Жамиятнинг банк ва бошқа молия ҳужжатларида биринчи имзо ваколатига эга бўлади.

Ўзининг ваколатлари доирасида, Жамият мижозлари, корхона ва ташкилотлар билан шартномалар ва контрактларни имзолайди ва битимлар тузади;

Жамият ходимларини ишга қабул қилади, улар билан меҳнат шартномаларини тузади ва бекор қилади, уларга нисбатан интизомий жазо чораларини қўллайди, ходимлар томонидан меҳнат ва ижро интизомини сақлаб туришини таъминлайди;

Жамият номидан амалдаги қонунчиликка асосан ишончномалар беради;

Жамиятнинг барча ходимлари, унинг таъсисчилиги асосида ташкил этилган шўъба ва тобе хўжалик жамиятлари, ваколатхоналари ва филиаллари томонидан бажарилиши мажбурий бўлган буйруқлар, фармойишлар қабул қилади ва расмий шаклларда кўрсатма ҳамда топшириқлар беради;

Қонунчилик, ушбу Устав ва Жамиятнинг меъёрий ҳужжатларига мувофиқ бошқа ҳуқуқ (ваколат) ва мажбуриятларга ҳам эга бўлиши мумкин.

13.19. Жамият Бош директори ва Дирекция аъзолари ўз ҳуқуқларини амалга оширишда ва ўз бурчларини бажаришда Жамият манфаатларини кўзлаб иш тутишлари лозим.

13.20. Жамият Бош директори ва Дирекция аъзолари Жамият Ягона иштирокчиси ва Жамият Кузатув кенгаши олдидаги ўз мажбуриятларини зарур даражада бажармаганликлари учун қонун ҳужжатларига ва мазкур Уставга мувофиқ жавобгар бўладилар.

13.21. Жамият Бош директори ва Дирекция аъзолари томонидан ушбу Устав ва меҳнат шартномаси шартлари кўпол равишда бузилса, ёхуд Жамият бизнес-режасининг тасдиқланган кўрсаткичларни бажарилиши бузилган ҳолларда ва уларнинг ҳаракатлари (ҳаракатсизлиги) натижасида Жамиятга келтирилган зарарлари сабабли улар билан тузилган меҳнат шартномаси қонунчиликда белгиланган тартибда муддатидан илгари бекор қилиши мумкин.

13.22. Жамият Бош директори ва Дирекция аъзолари ваколатлари муддатидан илгари тугатилган тақдирда уларнинг вазифасини вақтинча бажаришни Жамият Кузатув кенгашининг қарорига мувофиқ тайинланган шахс олиб бориши мумкин.

XIV. ЖАМИЯТНИНГ БИТИМ ТУЗИШДАН МАНФААТДОРЛИГИ

14.1. Тузилишидан Жамият Директори ёки ўз аффилиланган шахслари билан биргаликда Жамият Ягона иштирокчисининг манфаатдорлиги бўлган битимлар Жамият Ягона иштирокчисининг розилигисиз (қарорисиз) Жамият томонидан тузилиши мумкин эмас. Ушбу битимлар тузилиши қонун ҳужжатлари ва Уставда кўрсатилган тартибда амалга оширилади.

Мазкур Уставнинг 14.1. бандида кўрсатилган шахслар, уларнинг эрлари (хотинлари), ота-оналари, болалари, ака-укалари, опа-сингиллари қўйидаги ҳолларда Жамият томонидан битим тузилишидан манфаатдор шахслар деб эътироф этилади:

битим тарафлари ҳисоблансалар ёки Жамият билан муносабатларда учинчи шахсларнинг манфаатларини ифодаласалар;

битим тарафи ҳисобланувчи ёки Жамият билан муносабатларда учинчи шахсларнинг манфаатларини ҳимоя қилувчи юридик шахс акцияларининг (пайлари, улушларининг) йигирма ва ундан ортиқ фоизига эга бўлсалар (ҳар бири алоҳида-алоҳида ёки жамланган ҳолда);

битим тарафи ҳисобланувчи ёки Жамият билан муносабатларда учинчи шахсларнинг манфаатларини ҳимоя қилувчи юридик шахснинг бошқарув органларида лавозим эгаллаб турган бўлсалар.

Ушбу банднинг биринчи қисмида кўрсатилган шахслар ушбу Уставида белгиланган бошқа ҳолларда ҳам Жамиятнинг битим тузилишидан манфаатдор шахслар деб эътироф этилади.

Ушбу банднинг биринчи қисмида кўрсатилган шахслар:

улар, уларнинг эрлари (хотинлари), ота-оналари, болалари, ака-укалари, опа-сингиллари ва (ёки) аффилланган шахслари акцияларининг (пайлар улушларининг) йигирма ва ундан ортиқ фоизига эга бўлган юридик шахслар тўғрисидаги;

улар, уларнинг эрлари (хотинлари), ота-оналари, болалари, ака-укалари, опа-сингиллари ва (ёки) уларнинг аффилланган шахслари бошқарув органларида лавозимни эгаллаб турган юридик шахслар тўғрисидаги;

улар тузилишидан манфаатдор деб эътироф этилиши мумкин бўлган тузиладиган ёки тахмин қилинадиган битимлар тўғрисидаги аҳборотни Жамият Ягона иштирокчисининг эътиборига етказишлари керак.

Тузилишидан манфаатдорлик бўлган ва ушбу бандда назарда тутилган талаблар бузилган ҳолда тузилган битимлар Жамиятнинг ёки унинг Ягона иштирокчисининг даъвоси асосида суд томонидан ҳақиқий эмас деб топилиши мумкин.

Манфаатдор шахс Жамият олдида ўзи томонидан Жамиятга етказилган зарар миқдоридан жавобгар бўлади. Агар бир неча шахс жавобгар бўлса, уларнинг Жамият олдидаги жавобгарлиги солидар бўлади.

XV. ЙИРИК БИТИМЛАР

15.1. Йирик битимларни тузиш тўғрисидаги қарор қабул қилинадиган кундан олдинги охириги ҳисобот даври учун бухгалтерия ҳисоботлари маълумотлари асосида аниқланган Жамият мол-мулки қийматининг 25 (йигирма беш) фоизидан ортиқ қийматга эга бўлган мол-мулкни Жамиятнинг олиши, тасарруфидан чиқариши ёки Жамият бевосита ёхуд билвосита мол-мулкни тасарруфидан чиқариши эҳтимоли билан боғлиқ бўлган битим ёки ўзаро боғлиқ бир неча битим йирик битим деб ҳисобланади. Жамиятнинг одатдаги хўжалик фаолияти жараёнида тузиладиган битимлар йирик битимлар деб эътироф этилмайди.

Ушбу модданинг мақсадлари учун йирик битим натижасида Жамиятнинг тасарруфидан чиқариладиган мол-мулкнинг қиймати унинг бухгалтерия ҳисоби маълумотлари асосида, Жамият оладиган мол-мулкнинг қиймати эса - таклиф қилинган баҳо асосида аниқланади.

15.2. Қиймати жамият мол-мулки қийматининг эллик фоизи ва ундан ортиқ қийматни ташкил этадиган мол-мулкни олиш, тасарруфдан чиқариш ёки Жамият бевосита ёхуд билвосита тасарруфидан чиқариши эҳтимоли билан боғлиқ бўлган йирик битимларни тузиш тўғрисидаги қарор Жамият Ягона иштирокчиси томонидан қабул қилинади.

Ушбу моддада назарда тутилган талаблар бузилган ҳолда тузилган йирик битим Жамиятнинг ёки унинг Ягона иштирокчисининг даъвосига биноан суд томонидан ҳақиқий эмас деб топилиши мумкин.

XVI. ЖАМИЯТНИНГ МОЛИЯ-ХЎЖАЛИК ФАОЛИЯТИНИ НАЗОРАТ ҚИЛИШ

16.1. Ички аудит хизмати

Жамиятда ички аудит хизмати ташкил этилади. Ички аудит хизмати Жамиятнинг Кузатув кенгашига ҳисобдордир. Ички аудит хизмати аъзоларининг сони 2 кишидан кам бўлмаган малакали аудиторлардан ташкил топади.

Ички аудит хизмати Жамиятнинг ижроия органи, ваколатхоналари ва филиаллари томонидан қонун ҳужжатларига, таъсис ҳужжатлари ва бошқа ҳужжатларга риоя этилишини, бухгалтерия ҳисоби ва молиявий ҳисоботларда маълумотларнинг тўлиқ ҳамда тўғри акс этирилиши таъминланишини, хўжалик операцияларини амалга оширишнинг белгиланган қоидалари ва тартиб-таомилларига риоя этилишини, активларнинг сақланишини, шунингдек Жамиятни бошқариш юзасидан

қонун ҳужжатларида белгиланган талабларга риоя этилишини текшириш ва бу борада мониторинг олиб бориш орқали Жамиятнинг ижроия органи, ваколатхоналари ва филиаллари ишини назорат қилади ҳамда баҳолайди.

Ички аудит хизмати ўз фаолиятини Ўзбекистон Республикаси Вазирлар Маҳкамаси томонидан белгиланадиган тартибга ҳамда жамият Кузатув кенгаши томонидан тасдиқланган "Ички аудит хизмати тўғрисидаги Низом"га мувофиқ амалга оширади.

16.2. Аудиторлик ташкилоти

Молия ҳисоботлари тўғрилигини, бухгалтерия ҳисобини юритиш тартибининг белгиланган талабларга мувофиқлигини текшириш учун Жамият Ягона иштирокчисининг қарорига биноан қонун ҳужжатларида белгиланган тартибда аудиторлик ташкилоти жалб этилади.

Аудиторлик ташкилоти Жамият билан тузилган шартномага мувофиқ қонун ҳужжатларида белгиланган тартибда Жамиятнинг молия-хўжалик фаолиятини текширади ва унга аудиторлик хулосаси тақдим этади.

Аудиторлик ташкилоти Жамиятнинг молиявий ҳисоботи ва молияга доир бошқа ахборотлар ҳақида нотўғри яқун баён этилган аудиторлик хулосаси тузганлик оқибатида етказилган зарар учун Жамият олдида жавобгар бўлади.

XVII. ЖАМИЯТ ҲУЖЖАТЛАРИНИ САҚЛАШ

17.1. Жамият қуйидаги ҳужжатларни қонун ҳужжатларида белгиланган муддат мобайнида сақлаши шарт:

Жамиятнинг таъсис ҳужжатлари, шунингдек Жамиятнинг таъсис ҳужжатларига киритилган ҳамда белгиланган тартибда рўйхатдан ўтказилган ўзгартишлар ва қўшимчалар;

Жамият Ягона иштирокчисининг Жамиятни ташкил этиш ва Жамиятнинг устав фондига қўшиладиган пулсиз ҳиссаларнинг пул баҳосини тасдиқлаш тўғрисидаги қарорни, шунингдек Жамиятни ташкил этиш билан боғлиқ бошқа қарорларни ўз ичига олган баённомаси;

Жамият давлат рўйхатидан ўтказилганлигини тасдиқловчи ҳужжат;

Жамиятнинг ўз балансида турган мол-мулкка бўлган ҳуқуқини тасдиқловчи ҳужжатлар;

Жамиятнинг филиаллари ва ваколатхоналари тўғрисидаги низомлар;

Жамият Ягона иштирокчисининг, Кузатув кенгашининг қарорлари ва Жамият тафтиш комиссияси мажлисларининг баённомалари;

Жамият тафтиш комиссиясининг (тафтишчисининг) ички аудит хизматининг ва аудиторлик ташкилотининг ҳулосалари;

Қонун ҳужжатларида назарда тутилган бошқа ҳужжатлар.

17.2. Жамият ушбу Уставнинг 17.1.-бандида назарда тутилган ҳужжатларни ўзининг жро этувчи органи жойлашган ерда ёки Жамият Ягона иштирокчисига маълум бўлган ва унинг учун қулай бўлган бошқа жойда сақланишини таъминлайди.

XVIII. ЖАМИЯТНИ ҚАЙТА ТАШКИЛ ЭТИШ ВА ТУГАТИШ


18.1. Жамиятни қайта ташкил этиш (қўшиб юбориш, бирлаштириш, бўлиш, ажратиб чиқариш, қайта тузиш) ва тугатиш қонун ҳужжатларида белгиланган тартибда амалга оширилади.

18.2. Бюджет ҳисоблари, кредиторлар ва ишчиларнинг даъволари қондирилгандан ва тўлангандан сўнг, қолган Жамият мол-мулки, қонун ҳужжатларида белгиланган тартибда, Жамият Ягона иштирокчисининг таъсарруфига ўтади.

XIX. ЯКУНЛОВЧИ ҚОИДАЛАР

19.1. Жамият мазкур Уставда назарда тутилмаган ҳолатлар юзасидан Ўзбекистон Республикасининг "Масъулияти чекланган ҳамда қўшимча масъулиятли жамиятлар тўғрисида"ги Қонуни ҳамда бошқа амалдаги қонун ҳужжатлари талаблари асосида иш олиб боради.

Бош директор в.в.б



Ш.Эшмуродов